

Izjava: Ambasadori zemalja- članica Upravnog odbora PIC-a pozivaju da se prekine s huškačkom retorikom i pozdravljaju saradnju tužilaca iz Bosne i Hercegovine, Hrvatske i Srbije

Ambasadori Upravnog odbora pridružili su se visokom predstavniku u osudi napada na mezar Alije Izetbegovića. Očekujemo da će policijski organi Bosne i Hercegovine istražiti ovaj čin nasilja i utvrditi ko je odgovoran za njega, kako bi im se moglo suditi za taj zločin.

Ambasadori zemalja-članica Upravnog odbora danas su se sastali i apelirali su na političare da prekinu koristiti huškačku retoriku koja je tokom proteklih dana i sedmica dovela do rasta tenzija u Bosni i Hercegovini.

Političari imaju jasnu odgovornost za osiguranje stabilnog i pozitivnog političkog ambijenta i razvijanje tolerancije. Zadovoljenje pravde nije zadatak ni bh. političara niti političara susjednih zemalja.

Pravda je pitanje kojim se bave nadležne sudske institucije Bosne i Hercegovine, u suradnji s svojim kolegama iz susjednih zemalja. Ove institucije moraju osigurati krivično procesuiranje onih osoba koje su odgovorne za zločine počinjene tokom operacije «Oluja», kao i svih drugih ratnih

zločina.

U vezi s ovim pitanjem, ambasadori zemalja-članica Upravnog odbora su pozdravili zajedničke napore tužilaca iz Bosne i Hercegovine, Hrvatske i Srbije koji su se jučer sastali u Zagrebu kako bi razgovarali o istrazi i krivičnom gonjenju osoba koje su početkom augusta 1995. godine počinile ratne zločine u području Gornjeg i Donjeg Žirovca, u blizini Dvora na Uni, a čiji su snimci objavljeni u medijima tokom proteklih nekoliko dana.

Ambasadori zemalja-članica Upravnog odbora su pozvali tužioce da što prije završe svoj posao.